

14 JUN 1999

Ting-Kerusi

MCA BELUM BINCANG AGIHAN KERUSI, KATA TING

SEPANG, 14 Jun (Bernama) -- MCA sehingga ini belum lagi membincangkan mengenai pengagihan kerusi yang akan ditandinginya dalam pilihan raya umum akan datang dan menyerahkan perkara itu kepada Perdana Menteri Datuk Seri Dr Mahathir Mohamad untuk membuat keputusan.

"Setakat ini belum lagi ada perbincangan (kerusi pilihan raya). MCA menyerahkan perkara itu kepada Perdana Menteri (Dr Mahathir)," kata Setiausaha Agung MCA Datuk Dr Ting Chew Peh hari ini.

Beliau berkata demikian ketika diminta mengulas laporan berita yang mengatakan MCA sedang melobi untuk mendapatkan tambahan kerusi di Pulau Pinang pada pilihan raya umum akan datang.

Katanya, MCA sekarang ini sibuk dan hanya menumpukan perhatian kepada persiapan mereka menjelang pemilihan pucuk pimpinan tertinggi parti itu pada 17 Julai.

Ting yang juga Menteri Perumahan dan Kerajaan Tempatan sebelum itu menyampaikan bantuan kewangan menerusi Tabung Kemanusiaan Japanese Encephalitis (JE) MCA kepada 440 keluarga mangsa virus itu, dan kebanyakan mereka menerima RM1,000 bagi satu keluarga.

Laporan muka depan sebuah akhbar tempatan hari ini menyebut, para pemimpin MCA pusat sedang melobi untuk menggunakan formula 10-10 dalam pengagihan kerusi dengan Gerakan, komponen Barisan Nasional yang menerajui tampuk pemerintahan di negeri itu.

Pada pilihan raya umum lepas (1995), Gerakan bertanding di 11 kerusi, MCA 9, Umno 12 dan MIC 1 tetapi Gerakan memenangi 10 kerusi manakala MCA menang kesemua kerusi yang ditandinginya.

Gerakan tewas di Batu Lanchang kepada calon DAP Chong Eng.

Mengenai tabung JE anjuran parti itu, Ting berkata, setakat ini MCA berjaya mengutip kira-kira RM13 juta dan telah mengagihkan kira-kira RM6 juta kepada mangsa virus itu.

Katanya lagi, kerajaan juga telah membayar ganti rugi sebanyak RM5.1 juta kepada 81 penternak di negeri Perak menerusi satu akaun amanah yang ditubuhkan kerajaan bagi memberi ganti rugi sebanyak RM50 bagi setiap ekor babi yang dimusnahkan.

Beliau menggesa penternak babi di seluruh negara menghantar permohonan bantuan tersebut secepat mungkin supaya urusan penyemakan dan pembayaran dapat dilakukan segera.

Katanya, kira-kira 1 juta babi telah dimusnahkan setakat ini di seluruh negara dalam usaha membasmi jangkitan virus itu.

-- BERNAMA

APG NMO